

Storiis, segrets e ricetis dai Cjarsons Cjace al tesaur par fruts

La ARLeF e je a Friuli Doc cuntun apontament di autôr dedicât al plat simbul de Cjargne, la anteprime dal gnûf video YoupalTubo e un laboratori cun Daria Miani pai plui piçui



Profums, liendis e tradizions de Cjargne si puedin cjatâ intun sòl plat simbul: i cjarsons.

A Friuli Doc, la **ARLeF** Agjenzie regionâl pe lenghe furlane e à pensât di celebrâlu cuntun apontament che al met adun la cuisine dal teritori, la valorizazion de lenghe furlane e il lengaç dai socials. Lis storiis des Aganis, dai Guriuts e di tantis altris creaturis fantastichis a saran invezit protagonistis dal moment dedicât ai plui piçui e aes lôr fameis. Si conferme cussi – midiant de colaborazion cul Comun di Udin e cun Coldiretti FVG – la centralitât de

lenghe furlane in chest event.

TAL PALAÇ MORPURGO: "CUALE ISE LA VERE RICETE DAI CJARSONS?"

Il prin apontament al è fissât par **sabide ai 12 di Setembar aes 11:00**, te cort di Palaç Morpurgo, tal spazi di Coldiretti FVG. L'incontri **Cuale ise la vere ricete dai cjarsons?** al promet di disvelâ la storie e i segrets di un plat tra i plui innomenâts de cuisine de Cjargne e di chê furlane.

A condusi, cu la sô inconfondibile ironie vivarose, al sarà **Marcutti**, il *Friulencer* che al à milions di visualizacions.

Inveit, a fevelâ di chest plat identitari a saran doi protagoniscj speciâi: **Nicolas Fonzar**, cognossût pe rubriche "Mangjâ e muri" dal canâl YouTube *YoupalTubo* cun plui di 18.000 iscritti e cuasi un milion di visualizacions ogni an, al presenterà in anteprime assolute il gnûf video dedicât juste apont ai Cjarsons;

Germano Pontoni, innomenât Mestri di Cuisine, par tant timp president de Unione Cuochi FVG e autôr di passe 20 publicazions su lis ecelencis dai prodots dal teritori furlan.

Ambasadôr dal patrimoni culinari furlan tal mont – lu à rapresentât in tantis occasions internazionâls, come al Expo di Aichi in Gjapon e tal Expo di Milan –, Pontoni al contarà la origjin dai cjarsons cun **liendis e segrets di preparazion, storiis personâls e di altris innomenâts cogos furlans** che a àn fat cognossi chest plat ator pal mont.

L'incontri si sierarà cuntune cerce golose par cure de Associazion *Progetto Quattro Stagioni APS* (che Pontoni al è il president) ative

te promoziun culturâl tal setôr gastronomic.

CJACE AL TESAUR IN BIBLIOTECHE PAI PLUI PIÇUI

Pai plui piçui al sarà dedicât un spazi **sabide ai 12 di Setembar aes 16:30** te Sezion Moderne de Biblioteche Civiche "V. Joppi" cul laboratori creatif **Cjace al tesaur in biblioteche!** Cheste iniziative – nassude de colaborazion tra ARLeF, Comun di Udin, Biblioteche Civiche e Telefriuli – e je pensade pes frutis e pai fruts **dai 4 ai 10 agns** che a laran a cirî creaturis fantastichis dal Friûl platadis... tra i libris. Cun lôr e sarà **Daria Miani**, la innomenade condutore di *Maman!*, la trasmission televisive in lenghe furlane par fruts realizade de ARLeF e in onde su Telefriuli (che propit cul mê di Otubar e tornarà a scomençâ la sô programazion setemanâl). No mancjaran gadgets e sorpresis par ducj i frututs presints.

Iscrizions: al è obligatori notâsi dentri di **joibe ai 10 di Setembar**, scrivint a info@sportelfurlan.eu

IL SPAZI "FURLAN DOC" IN VIE MARCJÂT VIERI

Dai **10 ai 13 di Setembar**, la ARLeF e sarà ançe presinte tal spazi Furlan Doc, in vie Marcjât vier. La vetrine de lenghe furlane a Friuli Doc, coordinade dal Comun di Udin, e metarà adun ents, associazions e editôrs par ufri al public un panorame complet su lis novitâts, lis ativitâts e sui materiâi di promoziun dal furlan.

In foto: Marcutti, il "Friulencer" condutôr di "Cuale ise la vere ricete dai cjarsons?".